

KONTSUMOA. Administrazioa eta kontsumitzaileak ari dira horretan

Gabonetako erosketak «era egokian» egiteko gomendioak eman dituzte

Behar dena baino ez erostea eta salneurria zein kalitatea alderatzea eskatzen dute

Erredakzioa | **DONOSTIA**

Gabonak hurbil daudela eta, erosketak egiteko gomendioak egin dituzte hainbat administrazioek eta kontsumitzaile elkarteek.

«Erosketak aurretiaz eta ondo pentsatuta» egiteko eskatu die herritarrei Eusko Jaurlaritzako Kontsumo Zuzendaritzak. «Presaka ibiltzea eta azken egunetako jende multzoak saihestu behar dira. Era horretan, eskaintza zabalagoa izaten da, eta dirua aurrezten da», dio Kontsumo Zuzendaritzak kaleratutako oharra. Dirua aurrezteko beste bi gomendio egiten ditu: «Kreditu txartelaren erabilera kontrolatu; gastu larregi eta behar ez den produkturik ez erosteko, aurretiaz zerrenda eta aurrekontua egin behar dira». Gabonetan ere «buruaz» kontsumitu beharra dagoela transmititu nahi die Kontsumo Zuzendaritzak herritarrei.

Produktuen kalitatea bermatu behar da

Gabonetan ohikoak izaten dira otorduak; horiek prestatzerakoan, «egun hauetan prezio aldatetarik ez duten produktuak» badaudela gogorarazi du Kontsumo Zuzendaritzak. Halaber, egun hauetan oso ohikoak diren

EROSKETA

«Beharrezkoa dena bakarrik» erosteko gomendatu dute kontsumitzaile elkarteek

JAKIAK

Saltzaileek jakien kalitatea bermatu behar dutela ohartarazi dute

produktuen kalitatea bermatu behar dela nabarmendu du: «Oskoldunak erosterakoan, freskoak direla egiaztatu behar da, ez dute belztuta eduki behar burua eta enborraren arteko zatia. Arrain freskoek kolore biziak eta distiratsuak izan behar dituzte».

Gomendio orokor bezala, honako zerrenda kaleratu du Eusko Jaurlaritzako Industria, Merkataritza eta Turismo sailak: «Erosi aurretik, informatu beharra dago; zenbait denda bisitatu behar dira, eta salneurriak eta kalitatea alderatu behar dira; etiketak, osagaiak, pisua eta produktuen iraungitze data aztertu behar dira; ohiko den-

detatik kanpo erostean, produktuak baimendutakoak diren eta bermerik baduten aztertu behar da; faktura eskatu behar da, erreklamazio tresna bakarra baita....».

Jostailuen artean % 21eko aldea egon liteke

Iratxe Nafarroako Kontsumitzaile Elkarteak, bestalde, hainbat aholku kaleratu ditu Gabonetako erosketak behar bezala egiteko. Litekeena da jostailu bera, denda batetik bestera, %21 garestiago izatea, Iratxek salatu duenez.

Halaber, Iratxe Kontsumitzaile Elkarteak salatu du, publizitatea egiteko «nahasgarriak diren datuak» erabiltzen dituztela askotan: «Eskuorrietan dauden produktuak erosi behar dira, horiek erabiltzen baitituzte dendek jendea eroslekuetara erakartzeko». Zenbait dendak eskaintza urtarrilaren 5a bitartean egiten dutela dio Iratxek, «baina beste askok abenduaren 24 arte baino ez, eta hori letra txikian baino ez dute esaten».

Era berean, Iratxek salatu nahi du Gabonetako produktuak iragartzeko publizitate askotan, *baliagarria produktuak amaitu arte* esaldia jartzen dutela. «Produktu bat sustapena amaitu baino lehen amaitzen bada, dendariak antzeko bat eskaini beharko lioke erosleari sustapenaren hasierako baldintzetan», dio Iratxe Kontsumitzaile Elkarteak.

EZBEHARRA



GARI GARAIALDE / ARGAZKI PRESS

Itsasontzia erreskatatzeko lanak, atzo goizean

Bapora batek hondoa jo du Zarauzko hondartzan

Erredakzioa | **DONOSTIA**

Ostegun gauaz geroztik, bapora bat hondoa jota dago Zarauzko hondartzan. Atzo goizean saiatu ziren garabi batekin bertatik ateratzen, baina bertan behera utzi zituzten lanak. Zarauzko Udaltzaingoko iturriek atzo jakinarazi zuten, bihar jarraituko dute bapora bertatik ateratzeko lanekin.

Ostegun arratsaldeko 19:30ean ikusi zuten zarauztarrek bapora, hondartzatik gertu eta argiak piztuta zituela. Gauean, hondartzan geratu zen bapora hondoa jota, eta itsaso zakarrak itsas hesiraino bultzatu zuen. Ostiral goizean, erregai biltzeak hustu zituzten, eta atzo saiatu ziren garabi batekin ateratzen, baina ezin izan zuten.

HEMENGO
BERRI